

„Die poincten en articule bij Zijne Princeliche Excellentie den schepenen der twe bancken, edelen ende notablen, mitsgaders deeken en ende” (ici il y a une lacune, apparemment il faut intercaler „*den drye ledē der Stadt van Ghendt*“) voorghehouden tot remediën der saecken die gemene vreede ende ruste des landts aengaende.

Ten iersten, dat men zal verordenen een generael ende alghemeyn vergetenghe ende ondergravinghe vande voorleedene saecken, opdat alle achterdeyncken ende misvertrauwen wechgenomen ende affgeleyt zijnde, een iegelick dies te beter mach versekert ende gheruster weesen, ende daerduer die onderlinghe lieffde ende goede genegentheyt tusschen malcanderen wederom ghestichtet ende den

ghemeynen vyandt dies te beter geweert ende uuyt den landen gedreven mach werden.

Ten tweeden, dat sy haer van de unie ende vereeninge der Generale Staten egheenssins en sullen afscheyden, maer alle saecken der generaliteyt des landts aengaende eendrachtelick ende eenpaerlyck alzoe beleyden, dat midts dese voorszeyde unie een goede ordeninghe in alle saecken des te beter gestalt mach worden. Ende insonderheyt dat den ghemeynen last des krychs met ghemeyne oncosten, moyten ende arbeyt vervallen worde. Gemerckt dat het wel beter ende raedtsamer is den krych in't ghemeyne ende uyt den ghemeynen buydel te beleyden, dan dat elcke provincie op haer eyghen handt willende den last op haer nemen (die doch de gantsche generaliteyt swaer genoech valt) verwoest ende verdorven worde, ende den ghemeynen viandt openinghe ghedaen om de reste van de provinciën daernaer te overvalLEN.

Ten derden, dat men de articulen byden Generalen Staten meichmael bij brieven ende gedeputeerden voorghehouden aennemen ende verwillighen om daerdoor den wech tot een ghemeyne vrede ende eenicheyt te bereyden ende alle andere inconvenienten, die anders gheschapen zijn te rijsen, te moghen voorcomen.

Ten vierden, dat in saecken de generaliteyt aengaende vande landen ende graeffschappen van Vlaenderen niet en werde besloten ofte gheresloveert dan mit raedt ende verwillinghe der vier leden van Vlaenderen, dewijle dat het kennelijck is wat voor een misvertrouwen ende achterdeyncken ende dienvolghens wat voor een misverstandt, onvrientscap ende haet dat daer uuyt ontstaen, maer zoe die ghene die vanden lande verordent zijnde om die landsaeten „(sic, peut-être faut-il lire *landtssaeken*)” aan te hooren ende te disposeren nyet daer van en weten ende dat int ghene dat andere landen ende leden mede aengaet, in een stadt soude teghen haeren wille ofte sonder haeren weten iet gheordonneert worden. Ende ter contrariën wat een eendracht ende liefde het bijbrengt, als alle generale saecken mit ghemeynen advise worden besloten ende beleydet.

Ten vijfsten, dat naedemael men siet, dat de landen worden verwoest, verdorven ende berooft uuyt gebreke van betalinghe, ende

---

dat gheen ordeninghe „(ordonnancie porte l'autre copie)“ en is  
ghestelt op 'tfeyt aengaende die penninghen ende contributiën der-  
selver, waerdoor oock het onderlinghe achterdincken ende mis-  
vertrouwen opgevoedt ende onderhouden wordt, men sal eenighe  
goede ende bequame reghel ende ordeninghe so in het opbrenghen  
als het aenleggen ende uuytgheven der voorsseyden penninghen  
ende ghemeene contributiën raemen ende int werck stellen.

Ten lesten, dat de saecken die de generaliteyt van de stadt  
aengaen mit een ghemeynen accorde ende unie, bij weten, advyse  
ende besluyt vande collegiën, naervolghens d'oude privilegiën ende  
hercommen derselven hiernamaels in alle voorvallende geleghent-  
heden sullen altijt worden geraempt, besloten ende int werck ghe-  
stelt, op de eene wijse, ende de andere op een andere wijse iet  
ordonnerende gheene onvordeninghe ende confusiën daervan en  
ryse. „(Peut-être que cette phrase est altérée; il se peut qu'il  
faille lire *opdat d'een op de eene wyse etc.*)“ Waerdoor die saecken  
lancx so meer souden verachteren.

Aldus ghedaen inder stadt van Ghendt op den iiiie dach De-  
cembris 1578.”